


平定準噶爾方略續編

一一



漢書門類			
八	八	八	八
一	一	一	一
冊	架	函	號

內閣文庫			
三	八	八	漢
五	一	一	書
函	冊	冊	類
八	八	八	類
架	冊	冊	類

內閣文庫			
番號	漢	8815	
冊數	100 (84)		
函號	285	51	




Kodak Gray Scale

A 1 2 3 4 5 6 M 8 9 10 11 12 13 14 15 B 17 18 19



© Kodak 2007 TMI Kodak





平定準噶爾方略續編卷之二

乾隆二十五年三月庚戌。

淺草文庫

命犒凱旋之索倫等官兵。

上諭軍機大臣曰。兵部奏稱凱旋之索倫吉林察哈爾等官兵。經過京城。請於德勝門外教場。暫為休息。再行起程等語。所奏甚是。伊等俱軍前効力之人。咫尺京師。若即令遄行。非所以示體恤。現在各

隊官兵陸續到京著內務府大臣會同特派之御前大臣侍衛等照看賜以飯食稍爲休息再令其各回本處。

命將軍兆惠等查奏官兵親屬陣亡人數。

上諭軍機大臣曰軍營効力有功及陣亡官兵等俱據奏節次勅部議叙議卹至父子兄弟祖孫三人內有二人陣亡者卽未著有勞績而情尤可憫自

應格外加恩著將軍兆惠等陸續查奏。

命傷卹陣亡官兵奴僕等。

上諭軍機大臣曰軍營効力有功及陣亡官兵朕皆分別加恩叙卹至官兵奴僕陣亡均屬爲國捐軀自當加恩議卹著查明交部若官員奴僕陣亡將伊子弟准其開戶爲民如係兵丁奴僕著酌賞伊主身價亦准其爲民卽照陣亡例議卹其昭忠祠

祭祀。列名於兵丁之次。以示優獎。

諭御前侍衛署副都統安泰等。辦理哈薩克入覲事宜。

上諭軍機大臣曰。安泰等奏稱。哈薩克阿布勒瑪木比特。阿布賚等。遣呼圖拜。阿塔賚等。至烏魯木齊。恭進馬匹。並求入覲。謹將奏章封進等語。看來哈薩克等。恭順有加。著降勅獎諭。俟納旺抵烏魯木

齊。安泰卽令其同往。仍傳諭來使云。巴代爾等奏請入覲。恩旨派侍衛薩穆坦。護送來京。沿途行走。亦不必過急。一日約百里以外。併傳諭黑龍江將軍綽爾多。前所派索倫兵一千。若尚未派出。卽行停止。或業已整裝。亦令其在該處候旨。併傳諭成袞扎布等知之。

賜哈薩克阿布勒瑪木比特。阿布賚等

勅書。

皇帝勅諭哈薩克阿布勒瑪木比特。阿布賚。阿布勒比斯。哈巴木拜等。去歲爾等哈薩克之人。搶掠烏梁海。我將軍大臣等。卽欲興師問罪。朕因爾阿布賚等歸誠已久。須詢問確實。續因爾等貿易之人。告稱搶掠烏梁海。係爾處之巴魯克巴圖魯。則與爾等無涉。但爾等受朕深恩。若力能擒獻巴魯克

巴圖魯。更見悃誠。特遣侍衛納旺傳諭。尚在中途。爾等已遣使貢馬。並求入覲。或爾等知烏梁海被掠之事。悚懼祈請。以昭恭順。朕益鑒爾等誠意。爾等但遵旨將搶掠烏梁海等所獲。察出送還。卽巴魯克巴圖魯。亦尚可加恩曲宥。嗣後惟約束所部。以安生業。至爾等所奏。遵旨與布魯特和好。而去。年貿易人等。爲所掠奪等語。凡爾等外藩使人來

京。朕皆面諭以和輯鄰部。將來布魯特入覲。必更
加訓諭。務使守法安生。不至互相戕賊。爾等來使。
已命侍衛等護送來京。至日自加恩賞。今以降勅。
賜緞各四端。爾等其祇受敬悉。特諭。

賜御前頭等侍衛敦察拜哈巴圖魯號。賞銀一百兩。

壬子。

諭巴里坤辦事道銜同德等。解送葉爾羌馬匹。

上諭軍機大臣曰。同德等奏稱。准楊應琚咨。將巴里
坤牧馬一千一百八十餘匹。交存泰於三月十五
日起程。由朱爾都斯賽里木一路。送往葉爾羌等
語。近據舒赫德奏請送馬三千匹。朕以五吉業已
送馬二千匹。諭同德再選一千匹送往。今所奏與
朕旨相符。著沿途加意照看牧放。毋致傷損遺失。

癸丑。

諭叅贊大臣舒赫德等補授各城阿奇木伯克。

上諭軍機大臣曰。舒赫德等奏。烏什阿奇木伯克員缺。甚屬緊要。請以玉素富之弟阿卜都拉補授。又據阿桂。請以拜城阿奇木伯克噶岱默特補授。咨送奏稿前來。查和闐六城之阿奇木伯克。尤屬緊要。請以噶岱默特調補。其拜城之缺。令伊子阿卜都喇瑪補授。照英噶薩爾等城例。作為四品等語。

烏什阿奇木伯克著阿卜都拉補授。和闐阿奇木伯克著阿什默特補授。喀什噶爾阿奇木伯克著噶岱默特補授。葉爾羌阿奇木伯克著鄂對調補。阿克蘇阿奇木伯克著色梯巴勒氏調補。英噶薩爾阿奇木伯克著索勒屯和卓補授。其拜城阿奇木伯克作為四品。即著阿卜都喇瑪補授。

甲寅。

諭叅贊大臣阿桂等伊犁辦事屯田各事宜。

上諭軍機大臣曰。阿桂奏稱官兵回人過穆素爾嶺時。卽領兵二三百名。在呼爾岱等處。搜捕嗎哈沁。令伊柱先往海努克。督課回人耕作。若豐訥亨已到。卽與同行。否則暫留阿克蘇。俟五吉送馬到日。續來接濟等語。所辦甚是。伊犁辦事需人。常亮現在丁憂來京。著卽帶關防馳驛前往。交阿桂收掌。

協同辦事。又所奏圖桑阿固世衡現在葉爾羌。請派調一員等語。俱著前往伊犁協辦。又所稱官兵行糧。例載滿洲。索倫等兵丁。月支羊三隻。綠旗兵。月支二隻。現在伊犁未通貿易。綠旗兵於開墾營造。亦屬勤勞。請一體支給。俟秋收後。再照舊例等語。著照所請行。來年所發屯田兵丁。秋收前亦照此辦理。其烏什之貧回五百餘人。亦准將霍集斯

所存糧石酌量借給。以爲籽種。秋收時照數扣還。併傳諭舒赫德知之。

丁巳。

諭定新疆鬪毆殺人之例。

上諭軍機大臣曰。永寧等奏稱。固原州回民林福。與民人馬友。飲醉互毆。扎傷馬友殞命。將林福擬以絞候。解送巡撫衙門報部。入於秋審案內等語。哈

密尚與肅州相近。若伊犁。葉爾羌等處。又焉能長途解送肅州。此等新定地方。立法不可不嚴。將來內地貿易民人。與回人雜處。凡鬪毆殺人之案。卽應於本處正法。庶凶暴之徒。知所做畏。非可盡以內地之法治也。著傳諭各該駐劄大臣等。遇有似此案件。卽遵照辦理。俟新疆一切就緒。再降諭旨。其林福一犯。不必解送肅州。著卽行正法。

已未。

上御同樂園。

召哈密郡王品級貝勒玉素富。郡王品級貝勒霍集
斯。貝勒品級貝子鄂對等四十六人。

賜衣服茶果。

諭定邊左副將軍成袞扎布等辦理都爾伯特屬人
事宜。

上諭軍機大臣曰。成袞扎布奏稱。都爾伯特汗索羅
木袞布之喀屯布尼達喇告稱。自扎奇魯克齊策
塔爾等滋事以來。副管旗章京巴顏克什克等。頗
屬誠心効力。請卽以該章京等代策塔爾等之任
等語。策塔爾獲罪。由巴顏克什克等告訐。若卽補
其員缺。則無知之徒。又復以告訐爲能。妄生希冀。
且扎奇魯克齊現有和通辦理。巴顏克什克等不

平定回疆方略卷之二
九
過令其協助足矣。其所查策塔爾等牲隻什物。卽
令索羅木袞布。分賞所屬。不必歸公。
命以軍營解京回人等。分別安插發遣。

上諭軍機大臣曰。軍營陸續解送之回人內。特穆爾
汗之後裔莽蘇爾。哈什木。著加恩授爲頭等台吉。
舊和卓之孫阿卜都爾璜和卓。著加恩授爲二等
台吉。歸併額色尹等佐領下安插。其霍集占之舊

索丕摩羅瑪里木等。皆附和逆賊之人。雖從寬免
死。未便留京。著并其家口。發往廣東。福建。浙江。江
南等處。賞給官兵爲奴。

命加賑陝省沿邊州縣。

上諭大學士曰。上年陝省沿邊一帶。偶被偏災。業經
加恩賑恤。現屆青黃不接之際。麥秋未至。而例賑
已停。農民口食。未免仍有拮据。著再加恩。將被災

五分。以上之定邊。榆林。葭州。神木。府谷。懷遠等六州縣。無論極次貧民。俱加賑兩月。被災五分之安定。延川。宜川等三縣。俱加賑一月。照例折給。以資接濟。該部遵諭速行。

壬戌。

命安置回部郡王品級貝勒霍集斯於京師。

上諭軍機大臣曰。朕詢問霍集斯。以烏什回衆等告。

伊父子情事。據奏稱。因回人等與伊不合。是以被控。今懇請留京等語。其意殊屬誠切。著照所請。厚爲資給。安置京師。但其先世墳墓。遠隔故鄉。著加恩。將伊幼子托克托索丕。遣回阿克蘇。以供祭掃。其烏什所有田產。卽行變價。在阿克蘇置業。賞給托克托索丕承管。著舒赫德等。遵照辦理。仍傳諭該處回衆。俾咸知朕意。

命護視回部舊和卓木等墳墓。

上諭軍機大臣曰。逆賊霍集占等。雖負恩肆惡。自取誅戮。至其先世。君長一方。尚無罪戾。今回部全定。喀什噶爾所有從前舊和卓木等墳墓。可派人看守。禁止樵採污穢。其應行修葺分例。並著官爲經理。以昭國家矜恤之仁。而外藩等亦共知所激勸。著舒赫德。新柱等。卽遵諭行。

癸亥。

諭陝甘總督楊應琚等。停止購辦商駝。

上諭軍機大臣曰。舒赫德。楊應琚。奏稱。運送伊犁屯田兵丁口糧。需駝三千餘隻。除現存千餘隻外。再將哈密。闢展貿易人等所有駝隻。採買一二千。始足敷用等語。伊犁駐兵屯田。祇宜節次措辦。阿桂等現在前往。自應計其收穫何如。再行添派兵丁。

則駝隻亦不能預定。且官買商駝。諸多未便。設該商等聞風不前。則緩急何所取資。卽著傳諭楊應琚。速行停止。仍將原奏議覆。併諭伊等知之。

甲子。

諭叅贊大臣舒赫德等。酌調臺站馬匹。

上諭軍機大臣曰。舒赫德奏稱。由阿克蘇至伊犁。臺站馬匹不足。請將庫車所有之馬千餘匹。選擇備

用等語。駐兵屯田。關係緊要。臺站馬匹。必須充足。今烏魯木齊所易哈薩克馬匹甚多。著卽酌量調用。仍宜善爲牧放。不可因哈薩克貿易馬匹源源接濟。遂可任其倒斃損傷。著加意妥協辦理。

諭叅贊大臣阿桂等。辦理伊犁屯田事宜。

上諭軍機大臣曰。阿桂奏稱。現在辦理屯田兵丁回人等。於二月二十五日起程。伊柱亦陸續行走。至

阿克蘇督辦農具。又奏出馬匹之伊沙噶頗拉持
烏什辦事之葉爾羌噶雜納齊薩里等。各賞給緞
疋等語。阿桂此次奮勉辦理。甚屬可喜。回人頗拉
特等。亦俱能急公趨事。著加恩分別加賞緞疋。以
示鼓勵。至所奏聞哈薩克有搶掠烏梁海之事。伊
等若來伊犁。請體察情形。加意防範等語。哈薩克
阿布賚等。現在恭順有加。其滋事特一巴魯克巴

圖魯巴命納旺前往。傳諭索取。若哈薩克等前來
伊犁。當佯爲不知。密加防範。不必使回人等知之。
恐伊等性多疑畏。於事無益。至巡查塔爾巴噶台。
亦以屯田餘力。酌量辦理。不必過於急遽。

議新疆屯田糧運。及設官駐兵事宜。

叅贊大臣舒赫德。阿里衮。陝甘總督楊應琚等
奏言。來年前赴伊犁之滿漢兵丁四千名。及大

臣官員跟役等。共需七個月口糧。一萬零五百石。屯田籽種。一千五百石。除羊隻抵支四千五百石外。實運糧七千五百石。需用駝三千餘隻。除哈密闢展官駝一千餘隻。尚須購買商駝一千二百隻。并於肅州等處。辦買驢騾一千五百頭。備用。又臣等前奉

諭旨。酌議新疆添設文武員弁。請於伊犁阿克蘇葉

爾羌。各設總兵一員。兵備道一員。其同知。通判。都司。遊擊。及佐雜千把等員。弁均按南北兩路。情形添設。列單恭呈

御覽。奏入。得

旨。軍機大臣議奏。尋議伊犁屯田駐兵。原係將來次第辦理之事。未便以數千官兵回衆。同時並集於久曠之地。以增餽運之勞。應俟阿桂辦理就

緒。視其足敷若干人口食。再行酌量加增。至採買商駝。並非急需之務。轉令貿易民人。聞風疑懼。而驢騾一項。尤與口外不宜。業經奉

旨停止。應毋庸議。至伊犁回部各處。俱有辦事大臣。已足控制遠近。若添設鎮道以下各官。既與口外體制不符。而一切建造衙署。添設俸工。俱從內地經理。更滋煩費。且回衆不相浹洽。易起猜

疑。殊未妥協。亦毋庸議。總之新疆非巴里坤哈密可比。當因地制宜。在回城固不宜久駐官兵。卽伊犁一帶。亦仍當以滿洲將軍大員駐守。統俟阿桂辦理一年之後。再行酌辦可也。奏入。

上從之。

戊辰。

命正藍旗蒙古都統新柱。前往葉爾羌辦事。所遺員

命下缺。以叅贊大臣巴祿補授。

已已。

上以回部各使人等。於二十五日庚午起程。

御長春園澹懷堂。

賜哈密郡王品級貝勒玉索富。郡王品級貝勒霍集
斯。貝勒品級貝子鄂對等。四十六人宴畢。

召至同樂園。

賜茶果。又

諭軍機大臣曰。此次入覲回人等。賞賜頗多。伊等亦
有自置之物。念其初來京師。僱覓馱載維艱。是以
官爲辦理。但伊等若視爲成例。亦非經久之道。著
護送大臣等。善爲曉示。仍傳諭永寧。此等回人至
哈密時。卽用所留馬匹更換。若原數稍有倒斃。亦
酌量代爲僱覓起程。毋庸官辦。

諭叅贊大臣阿桂等。曉示哈薩克事宜。

上諭軍機大臣曰。成衮扎布奏。據薩拉布拉克卡倫。送到從哈薩克脫出之厄魯特和屯博勒等。告稱。現在哈薩克等游牧。已遷移塔爾巴噶台。又聞伊等。因巴魯克巴圖魯。搶掠烏梁海一事。恐大兵查拏致累。議令將人丁牲畜送還。倘仍不從。卽當擒獻等語。哈薩克遷移游牧之信。其果否雖難遽定。

但伊等部落人衆。素無約束。或有數戶人口潛來居住。亦未可知。著傳諭阿桂。酌派官兵數人。往探虛實。伊等果有踪跡。卽曉譬利害。諭以此地爲天朝平定。將來辦理駐兵。爾等從前在準噶爾時。尚不敢越界。此時豈可私行游牧。立行驅逐出界。併傳諭納旺。見阿布賚時。務卽索取搶掠烏梁海之人。或探知塔爾巴噶台。有哈薩克等。亦卽以已意。

二五
曉示阿布賚。令其移回。俱著伊等相機辦理。

授領隊大臣巴圖濟爾噶爾爲內大臣。

庚午。

命陞賞安臺効力之伯克薩里等。

舒赫德奏言。臣於二月十九日。自葉爾羌起程。

三十日。抵阿克蘇。查詢應設臺站處所。由阿克

蘇至穆素爾嶺。請設六臺。嶺上無水。酌爲步站。

過嶺至海努克。臺站人數。酌量增添爲三大臺。

俱派察哈爾總管敏珠爾。原任副都統揚桑阿

辦理。至官兵需用馬匹。惟烏什尚可酌派。現在

烏什之伯克薩里等。願爲承辦。謹將臺站地名

未里數。及官兵回人馬匹數目具奏。奏入。

上諭軍機大臣曰。伊犁臺站馬匹。伯克薩里。額塞木

圖拉等。願爲承辦。殊屬効力。昨據舒赫德奏。以阿

平定回疆方略卷之一
卅
卜都拉補烏什阿奇木之缺。薩里卽無職掌。但遇有伊沙噶等缺。亦可補授。著傳諭舒赫德。若烏什未有伊沙噶之缺。則各城有伊應陞缺出。亦可奏補。仍與額塞木圖拉。俱酌量獎賞。緞疋。

諭叅贊大臣舒赫德。察核霍集斯等。應得屬人產業。上諭軍機大臣曰。霍集斯。霍什克伯克。請留京居住。將伊等帶來屬人。及留住該處之戶口具奏。又有

烏什和闐哈密吐魯番。應取來京之人。及遣往原處回人。俱加恩照所請行。但霍集斯所請賞給伊子托克托索丕屬人。內多伊族。且產業頭緒繁多。著傳諭舒赫德等。查明伊所派屬人。果係世代僕役。卽照所請賞給。或乘便指派官人。則不可給與。其霍什克伯克。請在和闐安插之耕種回人。及哈喇哈什所屬。巴塔木蘇扎等處房產。是否舊日原

業。一併查明辦理。如實係伊等故物。絲毫不可令其入官。若稍有影射不實。斷不可任其得遂。傲倖之計。著將原奏一併錄寄閱看。

命定邊左副將軍成袞扎布等。停派喀爾喀等處兵丁。及駐劄布延圖事宜。

上諭軍機大臣曰。成袞扎布奏。准策布登扎布等咨。現在領兵三百。前往布延圖。應需預備口糧。所有

從前奏派喀爾喀兵一千名。向塔爾巴噶台。駐哈薩克邊界之處。應行請旨辦理等語。前經安泰。以哈薩克入覲貢馬情形具奏。是阿布賚等。恭順有加。已將所調索倫兵一千名停止。近日脫出之厄魯特等。又有哈薩克人等。欲擒獻巴魯克巴圖魯之語。則喀爾喀扎哈沁之兵。俱可不用。策布登扎布。前往布延圖之處。亦可一併停止。朕於軍行進

止。惟相度機宜。必不肯徒勞師旅。倘哈薩克將來
竟不擒獻巴魯克巴圖魯。其勢必須用兵。俟臨時
再降諭旨。

定邊左副將軍成袞扎布。解送都爾伯特汗索
羅木袞布所屬。欺主滋事之策塔爾等十四人
至京。

命分別發遣廣東福建等處。

辛未。

命加索倫總管薩壘。副都統職銜。

軍機大臣遵

旨。查奏軍營官兵親屬陣亡較多之索倫馬甲登濟

圖引

見得

旨。登濟圖著照驍騎校職銜卽用

壬申。

命吐魯番郡王額敏和卓之子木薩。遇阿奇木缺卽補。

上諭軍機大臣曰。據楊應琚奏。前往英噶薩爾。勸導回人等耕種謀生。令木薩明切曉示。衆皆誠心聽受。踴躍奮勉等語。木薩係額敏和卓之子。頗屬効力。近將玉素富之弟阿卜都拉。授爲烏什阿奇木。

木薩自應加恩。一體補用。現在未有缺出。著傳諭舒赫德。遇有各城阿奇木缺出時。卽以木薩奏補。諭陝甘總督楊應琚等。酌籌新疆屯牧事宜。

上諭軍機大臣曰。據楊應琚奏。巴里坤現存馬一千二三百匹。而甘肅各營馬匹。每年例應出廠。巴里坤一帶水草豐裕。請於安西等五處。提鎮標營。摘撥三千匹。赴巴里坤牧放。卽於此內撥出一千五

百解赴阿克蘇。其伊犁屯田需馬九百匹。竟由巴里坤解往烏魯木齊預備。其餘俱存巴里坤牧放。備撥等語。所辦自屬可行。但不知內地馬匹。是否足敷調撥。若已經照數撥往。則缺額竟不必亟於籌補。甘肅綠旗額馬。視他省較多。原爲邊防起見。今西陲平定。則各營馬匹。不過供應差操足矣。况巴里坤水草旣佳。同一牧放。而於馬有益且省飼

秣之費。豈不甚便。又如各營額缺。有必須購補者。卽於哈薩克馬匹內。酌量抽撥亦可。不必於內地採買。致費周章。或秋冬之際。有必須收槽馬匹。臨時預爲奏聞。至該督前奏伊犁等處設官屯田事宜。已據軍機大臣議奏行知矣。總之新疆自應次第經理。不可懈弛。亦無庸急遽。惟各就本地情形。因利乘便。隨時酌辦。以規久遠之計。若又大費內

地財力。以爲設官屯田之用。殊屬無謂。且軍務現已全竣。而收買駝騾。紛紛滋擾。愚民轉致猜疑。亦豈休息靜鎮之道。併傳諭舒赫德等知之。

甲戌。

諭巴里坤辦事道銜同德。停辦商駝。及稽察牧羣事。

宜。

上諭軍機大臣曰。同德奏准舒赫德等行文。將巴里

坤之馬。於六月間。挑選九百匹。送往阿克蘇。將駝騾驢頭內。擇其臙壯者。送往烏魯木齊。其現有駝七十五隻。又購買商駝四百餘隻。俱於三月間。緩行送往等語。近因楊應琚。以籌辦伊犁屯田駐兵各事宜。具奏朕諭。以次第辦理。不宜急遽。亦毋庸購買商駝。今同德等業經據文辦理。嗣後不必再行。仍曉示商人。以停止緣由。則價值自然平減。至

巴里坤牧放馬駝一事。據奏交齊大勇辦理。齊大
勇才具平常。若經管未能妥協。雖叅處亦屬無益。
仍當留心稽察。再於巴里坤滿員內。派一人協辦。
賜打牲總管阿爾哈爾沁。察達克齊巴圖魯號。賞銀
一百兩。又觀買商賈四百餘名。其
夏四月乙亥朔。命賞給在京安置回人祿米。

上諭軍機大臣曰。伯克霍集斯。霍什克伯克。額色尹。
瑪木特。圖爾都和卓等。安置京師。著照伊等應得
俸銀。賞給祿米。以資養贍。嗣後在京安置回人。俱
遵照辦理。

丙子。

命索倫達呼里。應授總管等官。借補食俸。

上諭軍機大臣曰。此次索倫達呼里等軍前甚屬効

力。因加恩額外補授總管。副總管等官。但缺少人
多。候補尚需時日。著將候補總管。副總管。暫以佐
領借補。候補佐領。驍騎校。暫以驍騎校領催借補。
俱照原品。給與俸餉。俟應得缺出。卽補。庶於伊等
生計有益。該將軍等卽遵諭行。

議給索倫等官兵俸餉事宜。

黑龍江將軍綽爾多奏言。欽奉

恩旨。賞給打牲之索倫達呼里官員半俸。揀選兵丁
二千名。賞給半餉。查乾隆七年。軍機處議覆呼
倫貝爾博爾德。曾經出兵之壯丁二千三百九
十餘名。俱給與錢糧。候缺出。裁汰。至二十四年。
裁過一千三百三十餘名。尚存一千五十餘名。
未便入於新選兵內。請於軍前撤回之索倫達
呼里等。未得錢糧者。揀選二千名。賞給得

旨軍機大臣議奏。尋議索倫達呼里等向未給與俸
餉。今蒙

恩軫念伊等効力軍前。准照呼倫貝爾等官兵之例
賞給。自應於軍前撤回官兵內揀選。不必將從
前給餉候裁之人派入。至撤回官兵等。現始到
京。回抵游牧。候該將軍等揀選。卽屆七八月之
間。請以八月初一日爲始。卽行給與俸餉。奏入。

上從之。

丁丑。

諭叅贊大臣舒赫德辦理屯田事宜。

上諭軍機大臣曰。舒赫德從前議奏伊犁屯田。一時
卽欲移駐數千兵丁回衆。朕見其意在作難。降旨
訓飭。嗣於會議屯田摺內。並無一語提及阿桂前
往伊犁一事。其意特以阿桂奮然請行。卽謂與伊

無與。將來辦理若稍有掣肘。當惟伊是問。復經飭諭。今據具摺回奏。並請竭蹶自効。著傳諭舒赫德。伊非不能辦事之人。一切惟宜實心盡力。此時若與阿桂和衷商酌。善為協力成全。非特二人均任其功。伊之出力。仍當在阿桂之上。其或意存沮抑。則朕亦自能鑒察。至所奏烏魯木齊收放哈薩克馬匹。於來年送往屯田處備用。日後仍多為市易。送至阿克蘇等語。所見甚是。馬匹就近撥用。較之巴里坤辦解。行走便易。臆分亦足。卽照此辦理。朕以屯田一事委之舒赫德。其加意勉之。

諭叅贊大臣阿桂等。會商搜捕逸賊事宜。

上諭軍機大臣曰。舒赫德奏搜捕藏匿嗎哈沁一事。擬咨商阿桂。於抵伊犁時。候馬匹送到。卽領兵赴伊犁上游。渡特克斯。向空格斯哈什搜捕。安泰領

兵往額林哈畢爾噶等處。越博羅布爾噶蘇嶺。至
洪郭羅鄂博和洛霍漸齊齊罕車濟搜捕。再循行
伊犁河之阿布蘭山。與阿桂會合等語。著將原奏
錄寄阿桂等閱看。伊等如馬力有餘。卽照此行走。
或稍有不足。亦不必勉強。仍將作何辦理情形具
奏。
命陞叙三等侍衛齊克慎等。

上諭軍機大臣曰。舒赫德奏三等侍衛齊克慎伊凌
阿藍翎侍衛阿玉什從前大兵被遮。在阿克蘇承
辦事件。及呼爾璊等處敗賊時。俱屬奮勉。西安馬
甲高士勉繕寫摺奏勤慎。願留軍營効力等語。齊
克慎以辦理錢糧業經議叙陞用。伊凌阿阿玉什
俱著以應陞之缺卽用。高士勉著以西安將軍衙
門筆帖式坐補。

戊寅。

命加賞伯克薩里等緞疋。

上諭軍機大臣曰。舒赫德奏稱。伯克薩里等六人。辦馬一百三十匹。解至阿克蘇。詳加驗看。臆分頗好。已照採買回人馬匹例。每匹給價十二兩。並賞給薩里等緞疋。氈料等語。薩里等辦解馬匹。情願捐助。殊屬可嘉。惟經給與價值。並賞給緞氈。仍著酌

量加賞緞疋。以示獎勵。

諭定邊左副將軍成袞扎布等。撤回駐劄哈薩克邊界官兵。

上諭軍機大臣曰。額爾克沙喇等。久在哈薩克邊界。此時信息若何。若曾示以兵威。卽以朕旨宣示。謂阿布賚業已遣使入貢。搶掠烏梁海一事。係巴魯克巴圖魯所爲。與伊等無涉。不必進兵。或但遣人

前往詢問。亦卽宣旨撤兵。俱著傳諭成衮扎布酌量辦理。

護軍統領努三。奏送擒捕嗎哈沁之厄魯特嚮導錫喇庫本。恩克勒德克蒙克津。色楞及其家口至京。

命賞給緞疋。安插於察哈爾旗分。

平定準噶爾方略續編卷之二
乾隆二十五年夏四月庚辰

論定邊左副將軍成衮扎布等。查辦烏梁海總管事宜

上諭軍機大臣曰。成衮扎布等奏據額爾克沙喇報稱。烏梁海總管扎巴罕等。游牧遠隔。以致被掠。又不加意防範。致所屬逃走。并疎脫看守之俘人布

什伯克請議罪示懲等語。著傳諭成袞扎布等。若扎巴罕不過疎忽。並無他故。且尚能管轄所屬。卽加以戒飭。仍令安居。若情有可疑。卽將扎巴罕解京。其總管之缺。另行選補。仍與察達克圖布慎等商酌辦理。

命赴新疆貿易旗民。地方官就近給照行走。
上諭軍機大臣曰。同德奏稱北路蒙古等。願以牲畜

來。巴里坤。哈密。闢展貿易者。俱由烏里雅蘇台將軍給與執照。其由張家口。歸化城。前往之商民。及內地。扎薩克。蒙古等。因領照紆迴。是以來者甚少。等語。新疆駐兵屯田。商販流通。所關最要。著傳諭直隸。山西。督撫。及駐劄將軍。扎薩克等。凡旗民願往新疆等處貿易。除在烏里雅蘇台行走之人。仍照前辦理外。其張家口。歸化城等處。由鄂爾多斯。

阿拉善出口。或由推河。阿濟行走。著各該地方官。及扎薩克等。按其道里。給與印照。較之專向烏里雅蘇台一路。可省四十餘日程途。商販自必雲集。更於新疆有益。該部卽遵諭行。

命乾清門侍衛訥齊訥棟保。臬庫納蘇魯克沁。前往阿克蘇。聽叅贊大臣舒赫德差遣委用。

賜二等侍衛鄂必達。博沁巴圖魯號。索倫總管塔濟

爾圖。錫魯古敦巴圖魯號。仍各賞銀一百兩。

命癸未。

命傳諭都爾伯特部落。加意收恤屬人。

上諭軍機大臣曰。理藩院奏。都爾伯特溫圖呼爾等。因生計窮乏。聞伊弟安插察哈爾。告知該扎薩克。前往尋覓。有違定例。請遞解原旗。令其管束等語。溫圖呼爾等。窮乏求生。實非得已。又經告知該管。

平定回疆方略卷之三十三
三
情尚可原。著加恩卽與伊弟一同安插。但該部落自投誠以來。編設旗分佐領。原欲伊等各安生業。若不善收恤。漸至分散。殊爲可憫。著成衮扎布傳諭該扎薩克等。其各加意撫綏。勤於約束。俾其守分謀生。不致流離失所。副朕痾瘝一體之懷。

命傳諭都爾伯特部落。查明內大臣巴圖濟爾噶爾家屬。送京完聚。仍按例折給該部落銀兩緞疋。

定邊左副將軍成衮扎布等。疏奏安插新附烏梁海戶口事宜。

成衮扎布等奏言。額爾克沙喇等報稱。二月間。在哈薩克附近之納林布魯勒等處。收得烏梁海原任總管阿喇善逃散之屬人蘇克色格什等。宰桑郭勒卓輝逃散之屬人楚魯木等。又嗎哈沁都楞烏拉岱托卜啟等。俱情願歸附等語。

臣等查此等降人向有收納之例。請將楚魯木都楞等二十一戶。令內大臣察達克兼管。烏拉岱托卜啟等二十二戶。蘇克色格什等四戶。令散秩大臣圖布慎兼管。奏入。得旨。如所請行。

乙酉。

乾清門侍衛德保。欽天監監正明安。圖監副三品

銜西洋人傅作霖。四品銜高慎思。侍衛五林泰等。繪畫回部輿圖還京。

命賞緞各四端。

丁亥。

諭總兵容保。傳示霍集斯子漠咱吧爾。在途養疾。從容起程。

上諭軍機大臣曰。容保奏稱護送漠咱吧爾。行至沙

泉子伊舊疾復發現令醫人調治似難速行等語。漠咱吧爾既有疾待醫卽養息數日俟痊愈後從容起程亦無不可伊父霍集斯已加恩優其廩祿居住京師并有家書寄示著容保卽交漠咱吧爾閱看仍令其善爲調攝與伊父相見有日也。

戊子。

諭叅贊大臣舒赫德等議奏酌補伊犁管轄屯田回

備吏人伯克事宜。

上諭軍機大臣曰舒赫德奏稱伊犁屯田回人一千戶辦理陸續發往應設立阿奇木伯克等缺以資管轄擬設三品阿奇木伯克一員請旨補授自四品伊沙噶至六品密喇卜伯克十五員或以現任伯克陞補或從著有勞績之人酌量選用其五品以上伯克令戴孔雀翎六品伯克令戴藍翎等語。

伊犁阿奇木伯克著額敏和卓之子木薩補授。仍以公品級管事。其四品以下各員。應先於阿桂現在帶領之回人伯克內選補。庶足以昭平允而示鼓勵。其作何酌量揀選補授之處。著舒赫德會同阿桂議奏。所授伯克等品級。及戴獎賞翎。俱著照上所請行。大員曰。欽此。奏。奉。旨。行。回。人。一。下。諭。吏部侍郎副都統海明。葉爾羌掌印列名事宜。

上諭軍機大臣曰。據海明奏。抵葉爾羌時。與額敏和卓章奏列名。及掌管關防之處。請旨遵行等語。海明係內地大臣。額敏和卓雖加王爵。究屬回人。不得與額駙策凌將軍成袞扎布爲比。著海明掌管關防。奏事列名。在額敏和卓之前。但伊不可以名居前列。卽輕視額敏和卓。額敏和卓老成諳練。辦理一切事宜。當與和衷商酌。則回人等益服我大

臣之虛懷。於公務自有裨益。

已丑。

諭部院衙門。及八旗大臣等。毋得任意指駁咨詢事
件。

上諭大學士曰。定長以恩賞臺站人員等事。咨詢兵
部。而該部以未經具奏請旨。不便查辦。駁回具奏。
從前各部院。將外來咨文。可以奏請辦理者。往往

任意指駁。屢經訓飭。今恩賞臺站人員。久經降旨。
定長咨詢。卽當奏請辦理。或謂其應先具奏。則於
奏內附參。亦無不可。乃徑行駁回。伊復准咨具奏。
往返稽遲。徒滋案牘。此皆推諉拘泥之陋習。兵部
堂司官。著傳旨申飭。嗣後准到各處咨文。其應辦
理者。卽行奏辦。或當參奏。亦卽附參。若仍前推諉
拘泥。任意指駁。必將定稿駁行之大臣。加以處分。

著再通行各部院衙門及八旗大臣等知之。

庚寅。

命陝甘總督楊應琚卽回本任。

上諭軍機大臣曰。前命楊應琚巡閱新疆。會同舒赫德等。查勘駐兵屯田事宜。嗣據節次奏報情形。屢降諭旨。令其隨宜妥辦。現在阿克蘇葉爾羌喀什噶爾等處。已有舒赫德專司其事。自可次第經理。

楊應琚身任總督。內地事務亦關緊要。且舒赫德辦理事宜。正資該督爲之接應。著傳諭楊應琚。此時旣無會商事件。卽回總督之任。并傳諭舒赫德知之。

辛卯。

諭叅贊大臣阿桂等。辦理駐兵搜賊事宜。

上諭軍機大臣曰。阿桂奏稱。領兵過穆素爾嶺。前抵

特克斯。伊分兵二百五十名。往阿勒坦和碩之阿
圭雅斯等處。搜捕嗎哈沁。餘兵護送回衆。往海努
克屯田等語。阿桂前奏。領兵往塔爾巴噶台。堵截
嗎哈沁等。彼時因烏梁海被掠一事。未知確實。故
由北路派兵。令策布登扎布帶領。在塔爾巴噶台
堵截。今已稔知哈薩克巴魯克巴圖魯所爲。遣使
往索。停止進兵。阿桂亦可俟來年有暇。再往巡查。

併傳諭舒赫德知之。再舒赫德奏稱。除阿桂帶往
兵丁外。因豐訥亨送馬伊犁。又派滿洲索倫察哈
爾兵三百名。合之前數。共兵九百名等語。從前阿
桂議奏。兵數僅五百名。今年屯田收穫。若不能給
千人之食。亦須預爲籌畫。並傳諭阿桂。所駐兵丁。
惟準收穫穀石。量其敷用與否。如有不敷。卽將餘
兵。發回阿克蘇等處度歲亦可。且接濟口食之牛。

羊併須乘時送往。庶不致冒寒行走。徒多傷斃。舒赫德等當會商辦理。又

諭曰。阿桂奏。伊領兵往阿圭雅斯一路。此時安泰。若卽前來。尚可會合。但行文未能卽達。不便守候。請令伊在伊犁附近搜捕後。卽由博羅布爾噶蘇直抵伊犁等語。前諭伊等會兵。特欲其兩路合圍。同至伊犁。並非謂伊等但一合兵。便可了事也。安泰

此時已抵博羅布爾噶蘇。亦未可定。伊等宜互相探聽。隨便會合。惟以搜捕盡淨爲要。至辦理嗎哈沁。與前此情形不同。現在逃往哈薩克之厄魯特等。多以困苦來投。或藏匿山谷。以丐餘生。亦不必盡行勦殺。當酌量招撫。其台吉宰桑之可疑者。解送京師。餘人分別安插。以供差遣。并須預爲曉示。則降者必多。否則伊等妄生疑懼。或以死守。或逃

往他處。乘間滋擾臺站。俱未可定。此內若有哈薩克錫喇等要犯。斷不可疎脫。併傳諭安泰等。加意奮勉從事。

癸巳。

命寬免烏梁海總管扎巴罕等革職治罪。

上諭軍機大臣曰。成袞扎布奏稱。詢問烏梁海總管扎巴罕。從前內大臣察達克等。傳令遷移游牧。伊

仍行戀住。致被哈薩克搶掠。又不能約束屬人。鄂勒錐圖。致令逃走。詢問章京布特勒圖。官兵拏獲之哈薩克布什伯克等。交令看守。乃因睡疎脫。俱罪無可辭。布特勒圖。應請旨。卽行正法。看守兵丁碩達等。應鞭一百。穿箭遊營。扎巴罕亦應正法。但年甫十七。伊屬人藐玩成習。情有可原。應請革去總管。另行揀選承襲等語。布特勒圖等疎脫賊犯。

自應從重治罪。但伊等俱係愚蠢之烏梁海。布特勒圖著從寬免其正法。兵丁等亦僅予斥革示懲。免其鞭責穿箭。扎巴罕不能管轄屬人疎脫賊犯。自應斥革。姑念年幼無知。從寬免其革職。仍令辦理總管事務。察達克圖布慎等有與伊游牧相近者。著派員協同辦事。仍以朕憫念伊等施恩曲宥之處。曉示知之。

丙申。

命副都統端濟布子伊達禮承襲三等輕車都尉世職。

己亥。

命優卹故內大臣薩喇爾。

上諭大學士曰。內大臣薩喇爾人頗篤實。効力有年。今患病溘逝。深為軫惻。著加恩派散秩大臣一員。

侍衛十員。往奠茶酒。仍賞銀一千兩。辦理喪事。又諭軍機大臣曰。薩喇爾病故。伊兄布林。現在熱河。若欲來奠醊。卽由驛赴京。或因天暑年邁。艱於行走。亦不必勉強。惟令薩喇爾之子奔赴可也。

壬寅。

諭叅贊大臣阿里袞。曉示拔達克山事宜。

上諭軍機大臣曰。拔達克山素勒坦沙。接奉勅書。賜

物。具表奏謝。并陳土貢。又致書阿里袞云。伊與鄂蘇伯克等部落相讐。請兵二萬往剿。阿里袞復書云。爾前此搶掠魯斯塔克。俘獲甚多。今又請大兵。示威鄰部。擴充游牧。不敢代爲懇請。爲當睦鄰和衆。以享升平之福等語。阿里袞復書詞意甚爲合理。素勒坦沙等。若因俘獻霍集占等。致鄰部興兵攻伐。伊等力不能支。或失地來投。我發兵戡定其

難尚屬可行。今欲藉兵威以開游牧。自當明白曉示。朕亦頒給勅書。仍著傅虎等齎往。再波羅泥都之尸。拔達克山人等。雖傳聞爲親隨伊犁雅斯盜去。已入昆都斯達勒罕。但虛實未可知。事屬既往。嗣後凡遇拔達克山使人。不必再三詢問。惟喀什噶爾有伊等先壘。或潛行埋瘞。駐劄大臣等。當留心訪查。傅虎等如齎送勅書。可令先曉大意。俾相

見時不致失詞。俱著遵照辦理。

賜拔達克山素勒坦沙。

勅書。

皇帝勅諭拔達克山素勒坦沙。據駐劄葉爾羌大臣奏。爾奉到勅書。賜物具奏陳謝。并陳土貢。又致書大臣云。從前爾部長密爾雜尼巴特。與噶爾丹策零和好。曾向彼乞師二萬。往攻昆都斯達勒罕。安

平定回疆方略卷之二
第占之地。諸鄂蘇伯克游牧。俱歸附爾部落。今因
爲天朝効力。誅戮霍集占等。致與鄂蘇伯克等爲
讐。祈轉奏大皇帝。發兵二萬。勦滅讐敵等語。爾素
勒坦沙因呈送逆尸。遣使入覲。朕旣特勅獎賞。又
聽爾盡收俘獲。使人至京。疊申宴賚。爾祇受朕恩。
自當安生樂業。奮勉圖報。今覽爾所述情節。朕嘗
聞爾舊部長瑪扎爾伯克之子。密爾雜尼巴特。曾

爲鄂蘇伯克部落所擄。瑪扎爾伯克以產寶石之
地。及馬匹什物。獻噶爾丹策零。請得宰桑哈柳兵
萬人。往鄂蘇伯克部落。雖取回密爾雜尼巴特。而
準噶爾人等。乘便搶掠。昆都斯達勒罕。安第占。俘
獲甚多。後準噶爾向爾部落。索取貢賦不與。又遣
和托羅等六千人來攻。瑪扎爾伯克始服。厄魯特
回人等。莫不知之。夫噶爾丹策零之發兵。其本意

豈相仗助。特利爾貢賦。又乘便搶掠爾鄰部。是非保愛之。正所以侵擾之也。朕爲天下共主。無分內外。一體撫卹。惟負恩肆逆。如霍集占。乃不能曲宥。其他循理守分之外藩。未有無故興戎者。卽如準噶爾素稱強悍。肆擾諸部。其後自相殘賊。朕以仁愛生靈之故。始發兵平定。厥後霍集占遁入爾地。將軍大臣等。咸請進兵。朕恐致驚擾。諭令駐師邊

界。遣使索取。皆爾素勒坦沙所知。爾旣著有勞績。若鄰部果因爾內附。恃強欺弱。結黨尋釁。或致力不能支。自當告之葉爾羌大臣。請旨發兵。以申天討。若爾地並未侵削。更欲開擴游牧。無故請兵。并吞諸部。則非以大恤小之義。朕心有所不忍。且內地兵馬甚多。數萬人無難調集。但距爾地頗遠。若抵爾游牧。所需芻糧宿舍。恐未能供應。徒滋驚擾。

耳。爾既誠心效順。惟宜約束所部。和輯鄰封。不可自啟釁端。以招外侮。長子孫而綿福祿。計無踰此。今以頒降勅書。賜爾蟒緞四端。爾其欽聽朕言。永承恩澤。特諭。

命加侍郎海明都統職銜。葉爾羌現有海明辦事。阿里衮卽上諭軍機大臣曰。葉爾羌現有海明辦事。阿里衮卽可回京。嗣後海明行文拔達克山諸部落。俱列銜。

於額敏和卓之前。但品秩未崇。恐見輕屬國。著授爲蒙古旗分都統。其益加奮勉。以副優擢。至新柱抵葉爾羌後。凡開列名銜。又當居首。俱傳諭知之。諭乾清門三等待衛舒常等。厄魯特兵俘獲人口。聽其帶回游牧。毋庸另行辦理。

上諭軍機大臣曰。舒常奏鄂齊爾告稱。所攜俘獲人等。情願於官給錢糧內。自行養贍。帶回等語。從前

因鄂齊爾等俘獲頗多沿途行走未便官爲廩給。故傳諭舒常吳達善等。作爲已意曉示。若伊等能於所得分例通融養贍。卽准帶回。或力有不能。則變價出售。亦可代爲辦理。今伊等旣稱通融減省。足敷口食。仍聽帶回游牧。無庸另辦。

癸卯。

命錄用回人薩哈勒索丕等。

上諭軍機大臣曰。內務府奏新編回人佐領內。應補驍騎校一員。領催四員。薩哈勒索丕著加恩授爲驍騎校。仍賞緞二端。其同來之們多索丕。呪雅斯。索丕。業經編入佐領。若們多索丕。能管轄人戶。卽拔補領催。

授副都統愛隆阿爲正白旗護軍統領。仍兼鑲白旗蒙古副都統。瑪瑞仍兼正白旗漢軍副都統。

五定回疆方略卷之二
三
叅贊大臣舒赫德疏奏審訊清馥罪案。

舒赫德奏言。臣奉到審訊清馥

諭旨。隨差人於四月初三日。將清馥帶至阿克蘇。將飾詞具奏情由。逐款審訊。據清馥親供。藍翎侍衛毛庫本等。招降嗎哈沁斗齊。令其先來投見。行至中途。忽將伴送之金國輔。尼瑪。殺害逃脫。本欲據實具奏。令隨印之寧夏防禦巴什勒繕

摺。巴什勒以爲不便。毛庫本亦再三懇求。一時昏憤。飾詞欺罔。罪無可辯。至巴里坤大臣等。叅奏逗遛近地。未曾深入。則所行道路。隨從官兵。俱可訊問。臣因清馥既經認罪。卽遵

旨。監看正法。謹恭錄

諭旨。及審訊供詞。通行各駐劄大臣知悉。奏入。得旨。下部知之。

命革寧夏防禦巴什勒職効力贖罪。

五月丙午。

諭管理屯田副都統定長等安設卡倫防範北山逸
賦。

上諭軍機大臣曰。納世通奏稱庫車一帶。通北山各
嶺處所。俱安設卡倫。派回人瞭望防守等語。所奏
殊中肯綮。現在阿桂等駐兵伊犁。搜捕嗎哈沁。伊

等無可棲止。或越嶺侵犯回人村莊。乘間盜竊臺
站馬匹。俱未可定。著傳諭各駐劄大臣等。將北山
要隘。可通回地者。俱安設卡倫。派兵防範。仍不時
委員巡查。嚴拿逸出賊匪。不可少有疎忽。

議烏魯木齊設官事宜。

陝甘總督楊應琚奏言。烏魯木齊現議移駐提
督。應設管理糧餉文員。請照哈密巴里坤之例。

添設同知一員。管理地方。監放兵餉。通判一員。收支糧儲。并設倉大使一員。又巡檢二員。分駐昌吉。羅克倫兩處。統歸哈密兵備道管轄。奏入。交得

旨。軍機大臣議奏。尋議伊犁以迄回部。一切駐兵屯田。自當另爲經理。至附近內地等處。如烏魯木齊。以至昌吉。羅克倫。一切管轄地方。收支錢糧。

自應添設文職。應如所請行。其添設各員缺該督又請將漢中府同知。同州府通判。韓城。洋縣。縣丞。西安府照磨。裁汰。移駐改補。亦照原議辦理。奏入。得

旨。同知著定爲滿缺。餘依議。

丁未。

諭總督管甘肅巡撫吳達善。查奏酌撥軍需銀兩事。

請宜。

上諭軍機大臣曰。吳達善請於鄰省撥銀六十七萬。餘兩協濟。爲涼州。寧夏。莊浪等營。加折糧料之用。部議以該撫甫經兩次撥銀三百八十萬兩備用。應卽在二次撥解銀兩內動支等語。該撫前請撥銀八十萬兩。原係接准楊應琚移咨。卽行奏請。後該處屯田駐兵事宜。概從緩辦。則所撥前項銀兩。

自屬充裕。且現在軍務告竣。諒亦無甚急需。著傳諭吳達善。此次請撥銀兩。卽照部議。在第二次撥解銀八十萬兩內動支。是否足敷應用。將來不致缺少之處。可詳查具奏。

戊申。

命致祭穆素爾嶺。

上諭軍機大臣曰。舒赫德奏稱。過穆素爾嶺。下至山

麓。有澗名塞塞克。愛噶爾雅勒。其險處約四十餘里。一值風雪。卽難行走。必須住候晴霽。從前準噶爾於其地樹旛誦經致祭。今四月初旬。遞送事件兵丁。有凍斃者。酌於附近之克斯地方。造屋以資避禦等語。穆素爾嶺。爲往來要路。今山澗險阻。猝遇風雪。人力難施。蒙古風俗。俱誦經致祭。著傳諭舒赫德。如回人內有善於禳禱者。令其虔誠將事。或無其人。卽遣厄魯特人致祭。

叅贊大臣舒赫德等。疏奏解送伊犁馬駝軍器事宜。

舒赫德等奏言。四月初七日。五吉解馬至阿克蘇。臣等挑選三四分臚之馬八百餘匹。阿桂前次所領官兵。及此次豐訥亨所領官兵。分別增給馬匹。於初十日起程。前往伊犁。餘馬一千三

百餘匹。派員於阿克蘇附近牧放備用。又選駝
一百一十七隻。添送威遠礮一位。及火藥鉛繩
等項。俱交豐訥亨帶往。奏入。報
聞。

辛亥。

授革職侍郎德爾格爲郎中。遇缺卽補。馳驛前往闕
展。隨同副都統定長辦事。

甲寅。

命革縣丞鮑立應職。仍照發遣例留巴里坤安插。
上諭軍機大臣曰。同德叅奏協辦錢糧之縣丞鮑立
應。因回民孫起雲與差役馬九互毆。違例將年逾
七十之孫起雲濫刑致斃。請交部嚴加議處等語。
鮑立應狗庇衙役。違例杖斃無辜。此等殘酷之員。
若不重治其罪。何以示懲。鮑立應著革職。枷號示

平定通志卷之三
三
衆滿日。仍照發遣民人之例。留於該處。同德將此等劣員。僅請交部議處。著傳旨嚴加申飭。

乙卯。

諭烏魯木齊辦事副都統永瑞等。市易馬匹事宜。上諭軍機大臣曰。烏魯木齊市易哈薩克馬一百三十餘匹。現議暫於巴里坤牧放。俟秋季得馬既多。再遣侍衛等前往。分羣駐牧等語。此項馬匹。若候

解到之日。始派員設立牧場。未免遲悞。著傳諭永瑞等。就哈薩克貿易情形。計至秋季。得馬若干。先行具奏。以便派員前往。再從前與哈薩克貿易。每取其騾馬。今既立牧場。則多收兒騾馬匹。方有孳息。但不可使知此意。祇云奉有恩旨。因爾等既帶兒騾馬匹。不必專收騾馬。致勞往返。嗣後一體交易。俟安泰從伊犁轉回。併傳諭知之。

恩免按察使銜納世通遺漏賞冊處分。

上諭軍機大臣曰。據納世通奏稱。從前辦理分賞各城回衆時。僅辦理庫車。沙雅爾兩城。遺漏賽里木拜。除補行分賞外。請交部嚴加議處等語。此等無心遺漏。旋即覺察。即請嚴加議處。則疎脫逃人及進兵不力。又當作何辦理。納世通著從寬免其議處。惟穆素爾嶺。係阿克蘇伊犁要路。著納世通酌

派官兵。不時巡查臺站。搜捕嗎哈沁。以靖地方。

丁巳。

命軍前効力撤回官員。先補該旗額缺。

上諭軍機大臣曰。黑龍江正黃旗滿洲驍騎校員缺。該將軍等。以獎賞藍翎領催嘉哈圖。金圖擬正。獎賞藍翎前鋒錫克索賚。領催坦色木保擬陪。請旨。驍騎校員缺。著擬正之嘉哈圖。金圖補授。擬陪之

錫克索賚坦色木保俱著記名。年來官兵因軍前
有功。額外授職者甚多。各該旗缺出。應先將此項
官員補授。俟錄用既徧。再照舊例。揀選應陞人員。
庶軍前効力者。不致壅滯。著交各該旗遵照辦理。
命賞故二等待衛多隆武恩騎尉世職。

上諭軍機大臣曰。二等待衛多隆武。在呼爾璊等處
擊賊。頗屬奮勉。今於軍營病故。雖非陣亡可比。亦

殊堪軫念。著加恩賞給恩騎尉。准襲一次。仍賞銀
五十兩。

戊午。

辦理伊犁屯田副都統伊柱。疏奏海努克興屯
事宜。

伊柱奏言。臣同阿桂。分路領屯田回人。前來伊
犁。於三月二十八日。至海努克。其地舊有廟宇。

又有築成營壘。周圍俱可耕種。卽將官兵駐劄。與屯田回人相隔二三里。易爲防護。其應行安臺瞭望之處。自東北塔前起。至東南。離本營四五十里。伊犁河南安臺五處。其屯田回人三百餘名。約相隔半里。立一村莊。共十五處。於四月初二日起。各修葺溝渠。引水灌田。計本月二十日。所攜粟麥。可播種全完。其回人所分各莊。均

有墻垣基址。暫行搭蓋窩舖。俟農隙卽伐木造房。臣等駐劄處所。有廟宇二所。喇嘛等大小住房百餘間。雖俱倒壞。加以修葺。尚可駐兵六七百名。俟阿桂轉回。再行酌定具奏。奏入。

上諭軍機大臣曰。伊柱奏稱屯田兵丁已抵伊犁之海努克。現在安設村堡。修理溝渠等語。看來伊犁屯田俱有舊蹟。將來漸次開拓。更於軍食有裨。著

傳諭伊柱於一切應辦事宜。先時相度加意奮勉。督策回人盡力耕耘。勿爲偷惰。其地畝數目。收穫情形。可遇便陸續奏聞。

諭御前侍衛署副都統安泰。搜捕嗎哈沁事宜。

上諭軍機大臣曰。伊柱奏。安泰至鄂勒濟。因大水暫駐河沿等語。安泰旣抵伊犁。又經休息。可卽於塔爾巴噶台一帶。搜捕嗎哈沁。若不能前往。卽由舊

路回烏魯木齊可也。

命議叙解送馬匹之都司永成等。

上諭軍機大臣曰。舒赫德奏。都司永成等。由烏魯木齊送馬一千餘匹。時值秋末草黃。沿途僅倒斃十五匹。應遵旨查奏。請將永成等交部議叙。其原任藍翎侍衛達爾扎桑。作何加恩之處。一併請旨等語。前經書山奏。派永成等送馬至阿克蘇。卽諭舒

平定回疆方略卷之二
赫德俟到時查奏。今既辦理妥協。著將都司永成防禦布岱。千總高天德。把總龍顯奇等。交部議叙。兵丁等賞給一月錢糧。達爾扎桑著加恩准其開復。

命定新疆兵丁回人等盜馬之例。上諭軍機大臣曰。舒赫德奏。拏獲阿克蘇盜馬回人拜密爾咱。因係積匪賊犯。照回人舊例斬決梟示。


等語。回地新經平定。拏獲匪犯。自應從重辦理。但內地或間有無恥兵丁僕役等。偷盜回人馬匹。若仍照內地之律完結。非所以示懲創。著傳諭辦理回部事務大臣等。嗣後回人盜本處及內地人馬匹。俱照伊等舊例。其內地人有犯。亦照此例辦理。併通行曉諭知之。

陝甘總督楊應琚等疏奏改設臺站事宜。

楊應琚等奏言。查南路一帶。戈壁本多。自哈喇沙爾至庫車千餘里內。如哈喇布拉克。至策得爾。計二百四十里。玉古爾城至托和龜亦二百四十里。俱係戈壁。又東至碩爾舒克六十里。西至庫爾勒七十餘里。有山岡二十四處。馬匹易於倒斃。臣等詢知玉古爾城至托和龜戈壁十餘里外。有阿爾巴特一處。可得水草。又距托和

龜七十里。有地名喀喇烏蘇。頗饒水草。行八十里。可至阿爾巴特。至庫爾勒等處山岡外。沿河另有捷徑。不過將山麓剷削。簽椿鋪土。如棧道式。人馬俱可安行。較之踰越山岡。計可省三十餘里。臣楊應琚書山定長。和其衷等會商。前因玉古爾城至托和龜戈壁甚遠。故於二站安設三站馬匹。今既有水草之地。應將多備馬匹撥

出。於阿爾巴特。安設一臺。再於喀喇烏蘇。安設
 腰站。在各臺馬內。抽撥。則道里之遠近。維均。而
 馬駝之往來。尤便。奏入。得。其。東。會。商。前。因
 旨。如。所。議。行。



長官。其。野。不。極。深。山。道。隨。隨。發。其。餘。之。取。對。置
 里。西。至。河。口。計。至。車。兩。海。等。安。山。圖。水。亦。既
 蘇。十。十。里。其。站。皆。皆。與。自。蘇。蘇。蘇。水。草。谷。八。十

